

PRK Kajang: Dr Wan Azizah menang dengan majoriti lebih kecil
Malaysian Insider
23 Mac, 2014

Presiden PKR Datuk Seri Dr Wan Azizah Wan Ismail berjaya memenangi Pilihan Raya Kecil (PRK) Dewan Undangan Negeri (DUN) Kajang dengan majoriti lebih kecil apabila mendapat 16,741 undi berbanding calon Barisan Nasional (BN) Datin Paduka Chew Mei Fun yang hanya berjaya mendapat 11,362 undi.

Kemenangan yang sudah dijangka itu melihatkan PKR meneruskan penguasaan mereka di kerusi campuran berkenaan, kerana sebelum ini Kajang adalah kerusi mereka yang dimenangi oleh Lee Chin Cheh.

Lee memperoleh 6,824 undi majoriti pada Pilihan Raya Umum ke-13 (PRU13), menewaskan lima lagi calon lain.

Dr Wan Azizah bagaimanapun hanya memperoleh 5,397 majoriti, kurang sekitar 1,000 undi apabila hanya 72%, atau 28,314 pengundi yang keluar mengundi berbanding 88.40% pada PRU13.

Kerusi DUN Kajang meliputi sejumlah 39,278 pengundi berdaftar yang layak mengundi dalam PRK kali ini.

Proses pengundian bermula jam 8 pagi dan tamat sekitar jam 5 petang dengan menyaksikan sejumlah 15 pusat daerah mengundi dibuka.

Kekosongan kerusi DUN Kajang berlaku secara mengejut apabil Lee secara tiba-tiba mengosongkan kerusinya bagi memberikan laluan kepada Ketua Pembangkang Datuk Seri Anwar Ibrahim bagi membolehkan pemimpin pembangkang itu menyertai pentadbiran negeri Selangor.

Ekoran keputusan Mahkamah Rayuan menjatuhkan hukuman penjara lima tahun terhadap Anwar, atas kesalahan meliwat bekas pembantunya sekaligus menyaksikan beliau terlucut kelayakan bertanding, yang memaksa PKR meletakkan Dr Wan Azizah sebagai calon ganti.

Proses pemilihan berjalan dengan aman meskipun, Pengerusi Suruhanjaya Pilihan Raya (SPR), Tan Asri Abdul Aziz Yusof menasihati penyokong parti agar tidak melakukan sebarang provokasi keterlaluan apabila terdapat beberapa penyokong yang membawa kangkung dan kelapa ke kawasan pengundian.

"Saya menerima laporan terdapat penyokong parti yang membawa sayur kangkung. Saya tidak tahu relevannya.

"Membawa sayur kangkung ini menjadi provokasi kepada pihak lain," katanya.

"Sayur ini untuk dimakan, jangan buat pembaziran. Kalau ramai sangat bawa kangkung ini ke sana ke sini, itu tidak elok," kata Abdul Aziz kepada pemberita ketika ditemui semasa melawat pusat daerah mengundi.

PRK DUN Kajang disifatkan sebagai "Langkah Kajang" oleh pemimpin PKR, namun parti lawan melihatnya sebagai usaha Anwar untuk menamatkan kemelut dalaman yang wujud dalam PKR antara Menteri Besar Selangor Tan Sri Abdul Khalid Ibrahim dengan Timbalan Presiden PKR Mohamed Azmin Ali. – 23 Mac, 2014.

Hakcipta © 2014 The Malaysian Insider

Source: <http://www.themalaysianinsider.com/bahasa/article/prk-kajang-dr-wan-azizah-menang-dengan-majoriti-lebih-kecil>